



24. september 2026

UKA2026/15b

Erik Jensen

Naalakkersuiasup siulittaasuata ammaanermi oqalugiaataa

(Oqaatsit anninneqartut atuupput) Ataqqinarteq Inatsisartut Siulittaasuata, ataqqinartut Inatsisartunut ilaasortat Naalakkersuisullu, minnerunngitsumillu asasagut innuttaasut tamassi.

Siullertut soorunami pinngitsoorusunngilagut Siumumiit nunatta siuttui oqaluttuarisaanermi pingaarutilerujussuarmi angusamilu annertuumut pilluaqqussallugit qujaffigissallugillu. Siumup ukiorpassuarni anguniagarisimasaa aammalu ilaatigut 2004-imi Igaliko-mi isumaqatigiissummi Siumut siuttuunerani anguniagaasoq taamanikkullu Inuit Ataqatigiinneersumik nunanut allanut Naalakkersuisuutitaqarnermi anguniagaq kiisami timitalerlugu alloriassutigineqarpoq. Taamaattumik aqquataa imaannaannginnikooqisoq aammalu ukiuni kingullerni marlunni aamma nukippassuarnik annertusisamik atuiffiunikooqisoq maanna kiisami atsioqatigiissutigineqarpoq. Tamatumunnga suleqataasimasut aammalu ullumikkut siuttuusut kiisalu atorfilittat Siumut sinnerlugu qamanngavik qujanarujussuaq, nunatta oqaluttuarisaanerani suliamut annertungaartumut suliasinnut ilungersoqataasimanissinnut. Qujanaq. Isumaqatigiisnullu pillugu kingusinnerusukkut maani Inatsisartuni sammilerutsigu Siumut ersarissumik isummorsorumaarpoq. Tamannalu qilaanaaraarput.

Siumumiillu neriutigeqaarput maanna nunatta iluani pissutsinut sammisunik aamma annertunerusumik sulinerit ingerlanneqaleqqissasut, inuiaqatigiimmi tamanna pisariaqartippaat.

Tallimannngormat Naalakkersuisut Siulittaasuata ammaanersiorluni oqalugiarnata kinguninngua pissutsit allanngupallassimagaluaqisut oqalugiaat saqqummiunneqartoq aallaavigalugu Siumumiit imaattumik oqaaseqarfigissavarput.

Inatsisartut ukiuat nutaaq aallartippaarput inuiaqatigiinni aammalu nunarsuarmi avatitsinni pissutsit annertuumik allanngorfianniippugut. Tamanna soorunami uagutsinnut qinikkatut piumasaaqateqarpoq. Ajornartorsiutit eqqartornissaat kisimi naammanngilaq. Aaqqiissutissanik ujartuisariaqarpugut, aalajangiisariaqarpugut, minnerunngitsumillu isaatitsissutissanik nutaanik ujaasinerusariaqarpugut innuttaasut ulluinnarni inuunerannut atugarissaarnermut aqqutissiuussissagutta politikikkut aalajangiinerit pisariallit sapiissuseqarfigalugit ingerlattariaqarpagut.

Naalakkersuisut siulittaasuata ammaanersiorluni oqalugiaataani Siumumiit pitsaasutut isigaarput peqqinnissaqarfiup nukittorsarneqarnissaa, kræftimik eqqugaasimasut pillugit suliniutit, sukanerusumik katsorsartinnissaat aammalu misissorneqartarnissaat eqqaaneqarmat, aammalu tarnikkut timikkullu nappaatit naligiinnerusumik pineqarnissaat isumaqarpugut pitsaasuusut. Meeqqat ilaqutariillu ajornartorsiutasa annertusinerunissaat pinngitsoorniarlugit siusinnerusukkut ikiorneqarnissaat oqaatigineqarmat Siumumiit suliniutit taamaattut tapersorsorparput. Ilinniartitaanermilu atuagarsornikkut piginnaasallit kisiisa pinnagit, assassornikkut piginnaasallit aamma aqqutissiuunneqarnissaat saqqummiunneqartut Siumumiit tapersorsorparpagut.



Illuatungiliuttuuneq isumaqanngilaq suut tamaasa akerlerisariaqarigut. Kisiannili siunnersuutit innuttaasunut piviusumik iluaqutaasut, partiitut akisussaassusillit inerisimasutullu sulisartuugatta soorunami taava tapersersortassavagut, kimit saqqummiunneqarneri apeqqutaatinnagit. Pingaarnepaajummammi innuttaasunut iluaqutaanissaat, taakkumi pillugit aamma Siumumi suligatta.

Kisianni illuatungiliuttut aamma pisussaaffeqarpugut Naalakkersuisut suliaat assigiinngitsut naammaginnartumik suliarteqanngippata taava akisutissarsissallutigit ujartuinnassinnut, kiisalu tikkuartussallutigit aqqinneqarnissaat siunertarigatsigu, inuiqatigiillu kalaallit nipaata Siumup Inatsisartunut apuuttarmagu. Tassa allaanerussuterpugut. Inuit tusaarusutaannaat aallaavigalugit sulisoqassanersoq imaluunniit piviusumik innuttaasut nipaata orullutaallu aqqinneqarnissaat pillugit sulissanersugut. Siumup soorunami inuiaat kalaallit nipaata aallaavigalugu sulivoq aamma suliuassaaq taamaattumillu maanna Naalakkersuisusut tamanna arlallit iluaalliutigisarpasippaat – uagut eqqortumik piviusumillu sulinerput tunngavigigatsigu.

Naalakkersuisut Siulittaasuata oqalugiaataani oqaaseq ataaseq uteqqianeqartoq tassaavoq: Akisussaassuseq.

Innuttaasut akisussaaffiat, angajoqqaat akisussaaffiat aammalu inuit ataasiakkaat sulinerminni, ilinniagaqarnerminni, meeqqaminnut, aningaasaqarnerminnut peqqissutsiminnullu akisussaaffiat eqqartorneqarpugut. Tamattami akisussaaffeqarpugut. Tamanna Siumup assortunngilaa.

Kisianni Naalakkersuisunut aamma erseqqissumik oqassaagut: Akisussaassuseq innuttaasunuinnaq kisimi pisussaaffiunngilaq, Naalakkersuisunut tamanna aamma akisussaassuseq atuuppoq – tamanna eqqaamalaartarisiuk.

Innuttaasut nioqqutissanik niivertarfinnut pisiniaraangamik aningaasaatimik naammatsinnissaat ajornartorsiutigippassuk Naalakkersuisut akisussaaffeqarpugut. Ilaqutariit ineqarnermut, kiassarnermut, innaallagissamut angallannermullu aningaasartuutaat qaffakkiartorpata taava aamma Naalakkersuisut akisussaaffeqarpugut. Utoqqaat akissarsiakinnerusullu aningaasatigit artorsarpata taava politikkikkut iliuuseqarnissaq Naalakkersuisunit aamma akisussaaqataaffigineqartussaavoq. Tamatumallu malitsigisaanik aamma siunnersuutini tikkuussinissaq tamatsinnut akisussaaffiulluni.

Naalakkersuisut inuuniarnikkut atukkat ilungersunarsiaartut aammalu aningaasartuutit qaffakkiartornerat nassuerutigaa, soorlu utoqqarnut, isertitakinnerusunut kiisalu ilaqutariinnut meerartalinnut aqqiiniarnerit ingerlanneqartariaqarlutik. Tamanna tunngaviumik Siumumiit isumaqatigaarput. Kisianni Naalakkersuisup siulittaasuata ataasinnuamilluunniit oqaatiginngilaa aamma siunnersuuteqarfiginngilaa tamanna **qanoq** tigussaasumik aqqinneqassanersoq. Ippassaaniami aningaasanut inatsisissatut siunnersuummi eqqartuinitinni tamannarpiaq pillugu aamma apersuivugut, oqaatsit kusanarluinnartut inuiaqatigiinnullu tusaruminartut kisimik naammangimmata kiisiannili piviusumik aningaasaliinikkut aamma malitseqartariaqarmata. Taamaattumik saqqummiussat ataqatigiinngillat.

Ataasiaannarmi ikiorsiineq politikkikkut ataavartumik aqqiinerunngilaq. Ullumi ajornartorsiut oqilisaassivigigatsigu, illuanilu aqagu akit qaffatsiterlugit pigutta taava aqaguagu ajornartorsiummut



pigisatsinnut uteqqissaagut imaluunniit qaammatip tulliani ajornartorsiummut tamatumunnga uteqqiinnassaagut.

Innuttaasut utaqqisinnaassuseerukkiartorput neriorsuuterpassuarnik qineqqusaarfigineqarnikuugamik. Taamaattumik oqallinnerit sakkortusiartornissaat naatsorsuutigineqarsinnaavoq – soorlu aamma siuliani taamaattorqartartoq. Aaqqissuusseqqinnerillu tamatigupajaaq aatsaat ukiut arlallit qaangiukkaangata innuttaasunut sunnuteqartarlutik. Taamaattumik Siumumiit ulluinnarni aningaasartuutit maanna Naalakkersuisooqatigiit qaffaaffigisaqattaaligaat innuttaasut piumasaqarlutillu nikussaaleriartornerannik malitseqassasoq naatsorsuutigineqartariaqarpoq, maannamut Naalakkersuisut tigussaasumik ersarissumillu iliuusissaminnik saqqummiussineq ajormata.

Naalakkersuisut Siulittaasuata oqalugiaataani nunaqarfiit isorliunerusullu siorna eqqaaneqanngillat, massakkullu taamaallaat ataasiarluni toqqaannartumik eqqaaneqarput, peqqinnissaqarfimmi digitalikkut aaqqiissutit eqqaaneqarnerannut atatillugu. Tassuunakkut ersarisseqqiinnarpoq nunatsinni partiip annerpaajusup qanoq tunngaviumik nunaqarfinnut isorliunerusunullu suusupaginitsiginini.

Nunaqarfinni isorliunerusunilu peqqinnissaqarfimmi digitalikkut aaqqiissutinik taamaallaat pisariaqartitsinngillat. Tassani innuttaasut aamma peqqinnissaqarfimmut, angallannermut, illunik/inissianik, ilinniagaqarnernissamut, inuussutissarsiornermut, pilersuinnermut aammalu pisortanit sullinneqarnissaat pitsanngorsassallugu pisariaqarpoq.

Nunaqarfiit isorliunerusullu pillugit isiginngitsuusaarinnittoqaqattaarnera neriuppugut inuiaqatigiit maluginialersimassagaat akuersaaginnassanngikkaallu tamanna. Nunatta ilagaat aamma nunatsinnut aningaasarsiornitsinnut napatitseqataanerpaanut ilaapput.

Nunatsinni sumi najugaqarnek inuup periarfissaanut killiliisuussanngilaq. Meeqqat nunaqarfimmi inunngorsimanerat pissutigalugu periarfissakinnerulersissanngillat. Utoqqaat illoqarfiit annerit avataani najugaqarnertik pissutigalugu toqqissisimanartumik kiffartuunneqarnissaannut periarfissakinnerulersitsisoqassanngilaq.

Innuttaasut tamarmik nunatsinnut akileraartarput, inuiaqatigiinnullu tunniussaqaartarlutik. Taamaattumik aamma ineriartortitsinermi peqataatinneqartariaqarput.

Kalaallit Nunaat tassaannaanngilaq illoqarfiit annersaat kisimi imaluunniit illoqarfinni annerinnarni inulik. Kalaallit Nunaat tassaavoq Siorapalummiit Aappilattumut (Kujalleq) kiisalu Ittoqqortoormiut tikillugu sineriak illoqarfippassuit kiisalu nunaqarfinnik inulik. Taamaattumik Siumup Naalakkersuisunut piumasaraa nunaqarfiit isorliunerusullu pillugit oqaasiinnaanngitsumik, kisianni politikikkut pilersaarummik ersarissumik takutitsisarnissaat.

Angallannikkut qanoq pitsaanerulersitsissaagut? Pilersuineq qanoq qulakkiissavarput? Inissianik qanoq pilersitsissaagut? Suliffissat qanoq pilersissavagut? Peqqinnissaqarfik qanoq nukittorsassavarput? Meeqqat inuussuttullu ilinniagaqarnissamut qanoq pitsaanerumik periarfissaqartissavagut? Allarpassuillu.



Tamakkua tassaapput innuttaasut ulluinnarni inuuneranni pingaarutilerujussuit paasissallugit.

Naalakkersuisut oqarput Kalaallit Nunaat amerlanerusunik isertitaqartariaqartoq. Tamanna Siumup isumaqatigaa aamma aaliangiiffissatut siunnersuummik qaqsissutiginikuuvaa. Atugarissaarnermi tamatta kissaatigeqisarput aningaasalersorneqartariaqarpoq, aningaasaqarnikkut nammineersinnaanerulernissarput angusariaqaratsigu pisariaqartikkatsigu.

Kisianni taava apeqqut ersarissaq tassaavoq: Isertitat suminngaanneerpat?

Nunatta isaatissutigisaa pingaarnerpaaq tassaavoq aalisarnek. Uggornaqaarli Naalakkersuisup siulittaasuata ammaalluni oqaaseqaataani annikitsuinnarmik eqqaaneqarmat. Piniarnek aamma taamatut.

Siumumiit tamanna tupigusuutigaarput. Tassami aalisarnek nunatsinni aningaasaqarnermut tunngaviuvoq. Sinerissami illoqarfinni nunaqarfinnilu suliffippassuarnut sulisartoqarneranullu tunngaviuvoq. Piniarnerlu aningaasarsiornermut, kulturitsinnut, kinaassutsitsinnut aammalu inuunitsinnut ilaalluinnarpoq. Aalisartut piniartullu pillugit aatsaat qinersisoqassatillugu oqaluttoqartassanngilaq. Ulluinnarni politikikkut aalajangiinerni aamma peqataatinneqartariaqarput.

Siuariartorneq pillugu oqalukkaangatta avataaniit aningaasaliissutit kisimik pineqassanngillat. Namminek aalisartortagut, piniartortagut, aallarnisaasut suliffeqarfiutigullu ineriartortinneqartariaqarput. Namminek pisuussutitsinnik naleqarnerulersitsineq annertunerusumik nunatsinniiginnartariaqarmat, taamaalilluni suliffissat aningaasallu sinerissami inuiaqatigiinnut iluaqutaaqqullugit.

Ineqarnermut tunngatillugu Naalakkersuisut inissianut aserfallatsaaliinermut kinguaattoorutit annikillisinniarlugit aammalu ilaqutariit isertitakinnerusut akunnattumillu isertitaqartut akissaqarsinnaanissaat Siumumiit kissaatigaarput. Kisiannili Naalakkersuisut akinik qaffaasaqattaartussaapput ukiunilu aggersuni tamanna ingerlaqqittussaalluni. Uggoreqaarpullu soorlu ineqarnermut tapit (boligsikring) ataasinguamilluunniit eqqaaneqaranilu aaqqiiviginissaa pilersaarutigineqanngimmat, naak partiit saamerlertut imminnut taajortut nunatsinni siuttooqataagaluartut.

Taamaattumik aaqqissuusseqqinnerup ineqarnermut akiliutinut, kiassarnermut akiliutinut, ineqarnermut tapinut (boligsikringimut), aserfallatsaaliuinnermut aammalu illunik/inissianillu nutaanik sanaartornissamut qanoq kinguneqarnissaa eqqartorlugulu aaqqiivigineqartariaqartoq Siumut isumaqarpoq.

Aamma matumani nuna tamakkerlugu eqqarsaatigalugu. Illoqarfiimmi annerit kisimik inissaaleqiffiunngillat aammali illoqarfiit mikinnerusut nunaqarfinnilu utaaqqisoqarpoq.

Siumumiit assorujussuaq uggornartutut isigaarput nunatsinni meeqqat angerlarsimaffiup avataanut inissinneqartarneri pillugit ajornarsiuterujussuaqalersimanitta saniatigut ajornartorsiut alla aamma annertoorujussuaq Naalakkersuisut Siulittaasuata oqalugiaataani pingaarutilittut inissinneqarsimanngimmat. Eqqagassalerineq eqqaaveqarneq, ESANI-mut aamma tunngasoq.



Nunatsinni sumiiffinni arlalinni eqqakkat katersuutiinnartut takusinnaavagut. Aamma Naalakkersuisut angalanikooqigamik qularnanngilaq tamanna arajutsisimanaviannngikkaat. Avatangiisitsinnut, peqqinnermut, pinngortitamut aammalu meerartatsinnut nuna qanoq ittoq ingerlateqqinniarnerripput immitsinnut aperisariaqarpugut. Ajuuvillunimi ajortoqarpoq eqqagassalerineq eqqarsaatigalugu. Maanilu Inatsisartuni sammisaqattaarpagut, eqqartorpagut il.il. kisiannili piviusumik sinerissami nunaqarfinni isorliunerusuni illoqarfinnilumi pitsanngoriaataasumik sulit takusaqarata. Tamanna ajorpoq. Tamaavittalu tamatta piaartumik aaqqiisoqarnissaa suliarisariaqarparput, aporfilersuinerujussuillu unitsittariaqalerpagut.

Siumut isumaqarpoq aaqqiissut ataaseq nuna tamakkerlugu atorneqarsinnaanngitsoq nassuerutigisariaqaripput. Nunatta isorartussusia, angallannikkut periarfissat aammalu najugaqarfiit angissusaat assigiinngillat. Taamaattumik najukkani pissutsinut naleqqussakkanik Inatsisitigut aaqqiissutissanik nunarput pisariaqartitsivoq, ilaatigut avatangiisinut peqqissutsimullu illersorneqarsinnaasumik mikinerusunik ikuallaaveqarsinnaaneq aporfilersorunnaartariaqarpoq.

Malittarisassat avatangiisitsinnik illersuisariaqarput, kisianni malittarisassat innuttaasut ajornartorsiutaannik aaqqiinissamut akornutaaginnartunngortinneqassanngillat. Eqqakkat namminneq peerunnavianngillat. Naalakkersuisut kommuunit suleqatigalugit piaarnerpaamik pilersaarummik saqqummiussisariaqartut Siumup piumasaraa. Oqaq amigavippoq assaat sulissapput!

Peqqinnissaqarfimmut tunngatillugu Naalakkersuisut saqqummiussaanni pitsaasunik arlalinnik takusaqarpugut. Sulisunik atorfinitsitsiniarnarup tigummiinnarneqarnissaasalu pitsanngorsarnissaat, kræftimut tunngatillugu sukkannerusumik misissorneqarnissaq katsorsarneqarnissarlu aammalu tarnikkut timikkullu nappaatit naligiinnerusumik pineqarnissaat saqqummiunneqarput. Siumumiilli assorujussuaq ajuusaarutigeqaarput maanna nunaqavissut sulisut aammalu tikisitat assigiinngitsumik akissaasersorneqalersimanerat sumi inunngorsimaneq aallaavigalugu akissaasersuineq (fødestedskriterie 2,0) maanna kalaallit peqqissaasuineq allarpassuarnillu atorfeqartut ajorluartumik suliffimminniit qimarrannerannik malitseqalersimasoq takullattaalerparput. Uggornaqaaq kalaaleqaterpassuagut peqqinnissaqarfiup iluani ilinniarsimasorpasuit ullumikkut peqqinnissaqarfimmi atorfeqarunnaarlutillu allamut nuussalutik ingerlalersimanerat. Tamanna Naalakkersuinikkut eqqumaffigineqartariaqarpoq aamma erngertumik aaqqiissutissarsiorfigisariaqarpoq.

Peqqinnissaqarfimmut tunngatillugu siammasinnerusumik isumaqatigiissuteqarnissamut Siumut aasarli piareersimavoq. Peqqinnisaqarfik pillugu Naalakkersuisup susassaartup aggersaraluartamigit pappiaqqat qallunaatuinnaq allaqqammata kalaallisoortai kissaatigigatsigillu sulit ulloq manna tikillugu aggersarneqaaqqinngilagut, naak akisussaaffimmik tiguseqataarusukkaluaqaluta aammalu siunnersuutissarpassuarnik peqataluarluta. Naalakkersuisut tassani suleqatigiinnissamut kajumissuseqarnerat pitsaasuvoq. Kisianni peqqinnissaqarfik nuna tamakkerlugu peqqinnissaqarfiusariaqarpoq aamma illoqarfinni minnerni nunaqarfinnilu. Digitalikkut aaqqiissutit iluaqutaasinnaapput, kisianni nakorsamut, peqqissaasumut imaluunniit peqqinnissaqarfimmi sulisumut taarsisinnaanngillat. Nunaqarfimmi imaluunniit isorliunerusumi najugaqarneq peqqinnissaqarfimmit ikiorneqarnissamut periarfissakinnerunermik kinguneqassanngilaq.



Ataqqinartut Inatsisartunut ilaasortat.

Naalakkersuisut Siulittaasuata ammaanersiorluni oqalugiaateqarnerata kingorna nunanut allanut isumannaallisaanermullu tunngatillugu pissutsit annertuumik allanngorput. Kalaallit Nunaata, Danmarkip USA-llu akornanni isumaqatigiissutigineqartoq nunatta oqaluttuarisaanerani pingaaruteqartumik alloriarneruvoq. Qulequtaq pingaarutilerujussuaq aammalu annertoorujussuaq isummersorfiginissanut Siumumiit assorujussuaq qilanaarpugut.

Nunat allat Kalaallit Nunaat pillugu aalajangiissanngillat. Kalaallit Nunaat nammineq kiisalu peqatigalugu aalajangiisoqartassaaq. Tamanna Siumup politikkikkut anguniagaanut toqqaannartumik attuumassuteqarpoq.

Ersarissumillu oqaatigereersinnaavarput Siumumiit isumaqaratta nunanut allanut oqartussaaffiup tamakkiisumik nunatsinniit akisussaaffigineqalernissaa kiisalu Washington-imi Kalaallit aallartitaqarfia Kunngeqarfiup Danmark-ip aallartitaqarfiata kælderiani inissisimajunnaarluni nammineq immikkut aallartitaqarfeqalernissaa tullinnguutariaqartoq suliarissallugu.

Nammineersinnaaneq nunarsuup uagutsinnut isiginerani taamaallaat eqqartorneqartassanngilaq. Ulluinnarni politikkikkut sulinitinnut ilaajuartariaqarpoq. Aamma erseqqissumik Siumumiit oqaatigissavarput: Nuna avammut nammineersinnaanerulernissamik naalagaaffinngornissamillu kissaateqartoq nammineq nunamini nukittusarnissaa akisussaaffinnillu angisuunik tigusaqalernissaa pisariaqalertoq.

Ilaqutariit aningaasaqarnerat ataqatigiissinnaanngippat, meeqqat pitsaasumik ilinniagaqarsinnaanngippata, innuttaasut katsorsarneqarnissaminnut sivisuallaamik utaqqippata, inissiat aserfallappata, eqqakkat katersuutiinnarpata imaluunniit nunaqarfinni isorliunerusunilu innuttaasut ineriartortitsinermut puigorneqarlutik misigippata, taava suliaasaq naammassisimassanngilarput.

Kalaallit Nunaat nukittoq maani illoqarfissuarmi kisimi sananeqarsinnaanngilaq. Kalaallit Nunaat nukittoq sineriak tamakkerlugu sananeqartussaavoq.

Naalakkersuisut suleqatigiinnissamut assamminnik isaassipput. Siumumiillu taanna tigulluassavarput. Pitsaasumik suliaqartoqaraangat nersualaarinnittassaagut. Siunnersuutillu innuttaasunut iluaqutaasussat tapersersortassavagut. Nunatsinnut iluaqutaasumik siammasissumik isumaqatigiissuteqartoqarsinnaappat peqataassaagut.

Kisianni suleqatigiinneq nipangersimanermik isumaqanngilaq. Siumut illuatungiliuttuuvog, innuttaasullu aamma naatsorsuutigaat Naalakkersuisut nakkutigissagigut.

Naammaginngisaqartoqaraangat eqqunngitsoqaraangallu ersarissuliorluta oqartassaagut. Neriorsuutit piviusunngunngippata apeqquteqartassaagut. Pitsaanerusumik aaqqiissutissaqarsinnaanera Siumumiit saqqummiuttassavarput.

Tamanna assortuiniarnerinnaanngilaq aamma tikkuartuinerinnaanngilaq. Tamannami tassaavoq tamat oqartussaqaataanerat (demokrati). Tassa Inatsisartuni illuatungiliuttutut akisussaaffipput.



Siumup kissaatigaa periarfissat atorlugit Kalaallit Nunaat aningaasaqarnikkut nukittunerulersinneqassasoq, politikikkut nukittunerulersinneqassasoq aammalu Naalagaaffinngornissamut oqallinnerput annertusisariaqalersoq.

Kisianni ineriartortitsineq innuttaasut tamarmik iluaqutigisariaqarpaat, avannaaniit kujammut, tunumiit kitaanut, illoqarfiit annersaanniit nunaqarfiit minnerpaat ilanngullugit.

Kalaaleqaterput sumi najugaqaraluarpalluunniit nunatsinni ineriartortitsinermut ilaalluni misigisinnaasariaqarpoq.

Tassa Siumup anguniagaa. Kalaallit Nunaat ataasiuvoq – Inuiaat ataasiusut pilersissallugit. Innuttaasullu tamarmik naleqarput.

Qujanaq.

Erik Jensen, Siumut